

ჩვენი გაზეთი იუბილარია, 90 წლის წინ, 1933 წლის 2 აპრილს დაარსდა გაზეთების: „თერჯოლის“, „წინსვლის“ და „საკოლმეურნეო სოფლის“ წინამორბედი, გაზეთი „ჩხარის კოლმეურნე“.



# 90 წელი თქვენთან ერთად!



„არს მთის კალთას, სკანდას, სასახლე მეფეთა და ციხე დიდი, დიდშენი“  
ვახუშტი ბაბრათიონი

# თერჯოლა

Facebook გაზეთი თერჯოლა  
www.nplg.gov.ge  
www.terjola.gov.ge

საზოგადოებრივი გაზეთი • გამოდის 1933 წლიდან • №14 (7091) 15 ივნისი 2023 წელი

## ამბები თერჯოლის მუნიციპალიტეტიდან... მზია ვერულაშვილი-80



გილოცავთ!

თერჯოლის ღვანლმოსილ პედაგოგს, მზია ვერულაშვილს 80 წელი შეუსრულდა.

მუნიციპალიტეტის მერმა, მანუჩარ რობაქიძემ, საკრებულოს თავმჯდომარის მოადგილე ნინო ჩხიკვაძესა და საგანმანათლებლო რესურსცენტრის ხელმძღვანელ ქეთევან შეყრილაძესთან ერთად ღვანლმოსილ პედაგოგს დაბადების დღე სკოლაში მიულოცა, განათლების სფეროში შეტანილი განსაკუთრებული წვლილისთვის მადლობა გადაუხადა და სასკოლო ცხოვრებაში წარმატებები უსურვა.

მზია ვერულაშვილი ქუთაისის პედაგოგიურ უნივერსიტეტში ფილოლოგიის ფაკულტეტზე სწავლობდა, აქტიურად ჩაერთო საგანმანათლებლო საქმიანობაში და ჩხარის №2 საჯარო სკოლაში დღემდე ჩვეული ენერგიითა და პროფესიონალიზმით ემსახურება საყვარელ საქმეს.

იმავე დღესვე, სკოლის მოსწავლეებმა მხატვრული ღონისძიება გამართეს, სადაც პატივისცემა, სიტბო და სიყვარული გამოხატეს პედაგოგის მიმართ.

შეხვედრას მერის მოადგილე მირზა ქოჩიაშვილი, საკრებულოში ძვერი-ჩხარისა და გოგნის მაჟორიტარი დეპუტატი მანუჩარ ფანჩულიძე დაესწრო.

## წინობა და ბავშვთა დაცვის ლამაზი დღე თერჯოლაში



## „ჩონგური საქართველოა, სიმები ჩვენ ვართ ყველაო!“

☎ 4, 5, 8



# ამბები თერჯოლის მუნიციპალიტეტიდან...

რუბრიკით: „ამბები თერჯოლის მუნიციპალიტეტიდან“, გთავაზობთ წერილებს, რომლებიც მომზადებულია საჯაროდ გამოქვეყნებული ინფორმაციების საფუძველზე.

## საცხოვრებელი სახლები სოციალურად დაუცველებს...



თერჯოლის მუნიციპალიტეტში სოციალურად შეჭირვებული ათი ოჯახისათვის სახლების მშენებლობა აქტიურ ფაზაშია.

მუნიციპალიტეტის მერი, მანუჩარ რობაქიძე, საკრებულოს თავმჯდომარის მოადგილე დავით გოგბერაშვილთან ერთად სახლების მშენებლობასთან დაკავშირებით მიმდინარე პროცესებს ადგილზე გაეცნო და მშენებლებს ვადებისა და ხარისხის დაცვის შესახებ ესაუბრა.

შეგახსენებთ, რომ მუნიციპალიტეტის მერის ინიციატივით, ადგილობრივ ბიუჯეტში სახლდაზიანების პროგრამის ეფექტური მუშაობისთვის გამოყოფილი თანხა გაიზარდა, რომლის ფარგლებში ამჟამად ათი საცხოვრებელი სახლის მშენებლობა მიმდინარეობს.

გარდა აღნიშნულისა, თერჯოლის მუნიციპალიტეტში სოციალური მიმართულებით, საჭიროების მქონე ბავშვიანი ოჯახების მხარდაჭერისა და გაძლიერების 2023 წლის პროგრამის ფარგლებში, მერიამ რამდენიმე ბენეფიციარს საყოფაცხოვრებო ტექნიკაც გადასცა.

პროგრამის მიზანია, მუნიციპალიტეტში რეგისტრირებულ სამიზნე ჯგუფს დაეხმაროს სხვადასხვა პირველადი საჭიროების მქონე ნივთების შეძენაში. ამ მიმართულებით შემოსულ განცხადებებს, ბავშვთა უფლებების დაცვისა და მხარდაჭერის განყოფილება განიხილავს.

ადგილზე გამართულ სამუშაო შეხვედრებს საკრებულოს თავმჯდომარის მოადგილე ნინო ჩხიკვაძე, სიქთარვა-ახალთერჯოლის მაჟორიტარი დეპუტატი ჯემალ ისაკაძე, ღვანკითისა და რუფოთის მაჟორიტარი დეპუტატი შალვა ჭანკვეტაძე, ასევე მერიის შესაბამისი სამსახურები ესწრებოდნენ.

## თავასა-თუზის დამაკავშირებელი გზა

თავასა-თუზის დამაკავშირებელი საავტომობილო გზის მშენებლობა უახლოეს დღეებში დასრულდება.

საგზაო ინფრასტრუქტურის მონიტორინგის ფარგლებში, თერჯოლის მუნიციპალიტეტის მერმა, მანუჩარ რობაქიძემ, საკრებულოს თავმჯდომარის მოადგილე ნინო ჩხიკვაძესთან ერთად თუზი-თავასის დამაკავშირებელი საავტომობილო გზის სამშენებლო სამუშაოები ადგილზე დაათვალიერა და პროექტის ხარისხისა და ვადების დაცვის შესახებ დეტალური ინფორმაცია მიიღო.

ამ დროისთვის ბეტონის საფარის მოწყობის სამუშაოები მიმდინარეობს. პროექტი მოიცავს არმირებული ბეტონის საფარისა და სანიაღვრე არხების მოწყობას, რომლის დასრულების შემდეგ გადაადგილება უსაფრთხო და კომფორტული გახდება.

გზის სარეაბილიტაციო სამუშაოებს რგვ-დან ადგილობრივი ბიუჯეტის თანადაფინანსებით ტენდერში გამარჯვებული კომპანია შპს „ჯეო როუნდ ინვესტი“ ახორციელებს.



## „დარისპანის გასაჭირი“ დიდი მწერლის კარმიდამოში...

ამ დღეებში, თერჯოლის მუნიციპალიტეტში, დავით და სერგო კლდიაშვილების სახლ-მუზეუმში „თბილისის ეთნოგრაფიული მუზეუმისა“ და „გლობალ თეატრის“ მონაწილეობით გაიმართა სპექტაკლი „დარისპანის გასაჭირი“.

წარმოდგენას თერჯოლის მუნიციპალიტეტის მერი მანუჩარ რობაქიძე, მერის მოადგილე მირზა ქოჩიაშვილი, საკრებულოს თავმჯდომარის მოადგილეები დავით გოგბერაშვილი და ჯემალ ისაკაძე, ასევე სხვა მონაწილე სტუმრები ესწრებოდნენ.

ხელმძღვანელმა პირებმა თეატრალური დასის წარმომადგენლებსა და ორგანიზატორებს მადლობა გადაუხადეს და წარმატებული საქმიანობა უსურვეს.

კლასიკოსმა, სახალხო მწერალმა დავით კლდიაშვილმა მნიშვნელოვანი წვლილი შეიტანა ქართულ დრამატურგიაში. განსაკუთრებული პო-

პულარობა მოიპოვა კომედია „დარისპანის გასაჭირმა“, რომელიც წარმატებით იდგმება ქართული თეატრის სცენაზე. ნაწარმოები, მოგვითხრობს თუ როგორ დაატარებს დარისპანი ოთხი გასათხოვარი ქალიშვილიდან ერთ-ერთს მეგობრებსა და ნათესავებში, რათა როგორმე უპოვოს შესაფერისი სასიძო და უზრუნველყოს მისი მომავალი.

სპექტაკლის რეჟისორია—დენ ჯოხაძე. თეატრალურ წარმოდგენას მერიის განათლების, კულტურის სპორტისა და ახალგაზრდულ საქმეთა სამსახურის უფროსი გურამ თურქაძე, ასევე მუზეუმის დირექტორი ლალი ღვინევაძე და ადგილობრივები ესწრებოდნენ.

ლონისძიება საქართველოს კულტურის, სპორტისა და ახალგაზრდობის საქმეთა სამინისტროს მხარდაჭერითა და პატრონაჟით გაიმართა.



## სავარჯიშო ტრენაჟორები ათ ლოკაციაზე...



თერჯოლის მუნიციპალიტეტში ჯანსაღი ცხოვრების წესის ხელშეწყობის მიზნით სავარჯიშო ტრენაჟორების მოწყობა გრძელდება

თერჯოლის მუნიციპალიტეტში, ჯანსაღი ცხოვრების წესის ხელშეწყობის მიზნით, აქტიურად მიმდინარეობს სავარჯიშო ტრენაჟორების მოწყობა.

მიმდინარე წელს, ადგილობრივი ბიუჯეტის დაფინანსებით, სპორტული კონსტრუქციების მოწყობის პროექტი, რომელიც მოსახლეობის თხოვნით დაიგეგმა, 10 ადმინისტრაციულ ერთეულში განხორციელდება.

ამ დროისთვის, სპორტული ტრენაჟორების

მოწყობა დასკვნით ეტაპზეა სოფელ კვასჭირში, ჭოგნარსა და გოდოგანში.

სამუშაოები მიმდინარეობს: რუფოთის, ალისუბნის, ზედა სიმონეთის, ქვედა სიმონეთის, გოგნის, ღვანკითის და ბარდუბნის ადმინისტრაციულ ერთეულებში.

ამ მუნიციპალური პროექტის მიზანია სპორტული ინფრასტრუქტურის განვითარება, სპორტში ახალგაზრდების მასობრივი ჩართულობა და ჯანსაღი ცხოვრების წესის დამკვიდრება.

## ქართული პოლიციის დღე...

31 მაისს, თერჯოლის მუნიციპალიტეტის მერმა მანუჩარ რობაქიძემ, საკრებულოს თავმჯდომარის მოადგილეებთან, დავით გოგბერაშვილთან და ნინო ჩხიკვაძესთან ერთად პროფესიული დღე მინაგან საქმეთა სამინისტროს თერჯოლის რაიონული სამმართველოს თანამშრომლებს მიულოცა.

„მინდა განსაკუთრებული პატივისცემით მოგილოცოთ პროფესიული დღე!

მადლობას გიხდით ღირსეული და თავდაუზოგავი შრომისთვის. ჩვენს თანამოქალაქეებზე ზრუნვა და მათი უსაფრთხოების დაცვა უდიდესი პასუხისმგებლობაა, რასაც ერთგულად და მაღალი პროფესიონალიზმით ასრულებთ. წარმატებებს გისურვებთ, როგორც სამსახურებრივ, ასევე პირად საქმიანობაში“—აღნიშნა თერჯოლის მუნიციპალიტეტის მერმა, მანუჩარ რობაქიძემ პოლიციელებთან შეხვედრისას.



# „ჩონგური საქართველოა, რეპორტაჟი“

საგანმანათლებლო რესურსცენტრის მიერ ორგანიზებული პროექტის—„ჩონგური საქართველოა“, დასკვნითი ნაწილი ღია ცის ქვეშ, სპორტის სასახლის მიმდებარე სკვერში გაიმართა. ღონისძიებაზე დათქმულ დროზე თითქმის ერთი საათით ადრე მივედი და არც არაფერი დამიკარგავს. ვნახე, როგორ შემოდოდნენ მუნიციპალიტეტის კერძო და საჯარო სკოლების პედაგოგიური კოლექტივები, მოსწავლეები, მშობლები და იკავებდნენ სკვერში წინასწარ შერჩეულ ადგილებს. ვესაუბრე სკოლის დირექტორების, პედაგოგების ერთ ნაწილს, მივიღე მრავალი ინფორმაცია თუ როგორი ენთუზიაზმით მუშაობდნენ პროექტზე, თვალს ვადევნებდი კუთხეების მოწყობის საოცარ სანახაობას. სწორედ აქ ითქვა, რომ ღონისძიების მზადების დროს ზოგი მონაწილე პირველად გაეცნო, ზოგმა გადაიმეორა და ყველამ ზეპირად ისწავლა აკაკი წერეთლის ცნობილი პოემა „ნათელას“ ერთი ნაწილი „ნათელას სიმღერა“, იგივე „ჩონგურს სიმღერა გავუბი“, ეს სიმღერა ხომ იმთავითვე გადავიდა ხალხში და ხალხურ სიმღერად იქცა, სიმღერად აქციეს იგი პროექტის „ჩონგური საქართველოა“ მონაწილეებმა და ეს სიმღერა და სხვა სიმღერებიც ისმოდა ყველა კუთხეში. მონაწილენი გამსჭვალულნი იყვნენ პატრიოტიზმით, სამშობლოს „გასაკვირველი“ გრძნობით. ყური მიუგდეს და გააცნობიერეს ამაღლებული სიტყვები: „შევუხმატკბილოთ ერთმანეთს“, „ერთი მეორის თანხმობით“, „ერთი მათგანიც რომ განყდეს მაშინვე უნდა შეველო“, „სხვადასხვა კუთხის მცხოვრებნი“, „და ჩვენ რად ვმღერით ცალ-ცალკე“, „ერთობა ჩვენთვის ტახტია“...

რესურსცენტრის მიერ ასეთი ღონისძიებების მოწყობა არ არის თითზე ჩამოსათვლელი, ყოველწლიურად ხორციელდება პროექტი, მაგრამ წლებანდელს, პროექტის სახელწოდებიდან „ჩონგური საქართველოა“ გამომდინარე, სხვა დატვირთვა ჰქონდა, სხვა სულისკვეთება, სულისკვეთება—საქართველოს დამოუკიდებლობის განცდის. მონაწილეებმა და არა მარტო მონაწილეებმა, ზეპირად ისწავლეს საქართველოს დამოუკიდებლობის აქტი, მისი შვიდი პუნქტი, გამოცხადებული თბილისში, სასახლის თეთრ დარბაზში 1918 წლის 26 მაისს, კვირას, ნაშუადღევს 5 საათსა და 10 წუთზე.

\*\*\*

პროექტის ფარგლებში შედეგების შეჯამებამდე და დასკვნით ღონისძიებამდე სკოლებში გაიმართა მრავალი კონკურსი და აქტივობა. კონკურსები: პრეზენტაციების, ხატვის, კალიგრაფიის, ესეების, ინტელექტუალური, აგრეთვე მინი კონფერენცია, მხატვრული კითხვის საღამო, თეატრალური შუადღე, ღია გაკვეთილები.

**პრეზენტაციების კონკურსი:** ჩატარდა ორ ეტაპად, მეცხრე-მეთორმეტე კლასების მოსწავლეთათვის. რაიონულ ეტაპზე მონაწილეობდა 14 მოსწავლე. გამოვლინდა 3 გამარჯვებული: ნინო მაჩიტაძე—ქვედა სიმონეთის №1 სკოლა, მარიამ უფლისაშვილი—თერჯოლის №1 სკოლა, ელა ერგემლიძე—ალისუბნის თემის №1 სკოლა.

**ხატვის კონკურსი:** ჩატარდა ორ ეტაპად ორ ასაკობრივ ჯგუფში პირველი-მეექვსე და მეშვიდე-მეთორმეტე კლასების მოსწავლეთათვის. რაიონულ ტურში მონაწილეობდა 27 მოსწავლე. გამოვლინდა 5 გამარჯვებული: ილია ამბროლაძე—სოკოლოვი-თერჯოლის №1, მილანა დივაკი—თერჯოლის №2, ნინო ქაშაკაშვილი—ახალთერჯოლა, ანანო კლდიაშვილი—ბარდუბანი, სესილი ამბროლაძე—ნავარევი, ანა ბერძული—ნახშირელე.

**კალიგრაფიის კონკურსი:** ჩატარდა ორ ეტაპად, სხვადასხვა ასაკობრივ ჯგუფში: პირველი, მეორე, მესამე-მეოთხე, მეხუთე-მეექვსე, მეცხრე-მეთორმეტე კლასების მოსწავლეთათვის და პედაგოგებისათვის. რაიონულ ტურში მონაწილეობა მიიღო 36-მა მოსწავლემ და 11-მა მასწავლებელმა. მოსწავლეებს შორის გამოვლინდა 12 გამარჯვებული: დაჩი საყვარელიძე, ანანო ქოჩიაშვილი—თერჯოლის №2, ბარბარე ქურცაძე—ღვანკითი, ნუცა ფორჩხიძე—სიქთარვა, ნია მექვაბიძე, ანანო კორტი—ზედა საზანო, არჩილ დოლაკიძე—თერჯოლის №1, მათე ფორჩხიძე—ძვერი, ელენე ლანჩავა—ნახშირელე, ელა ერგემლიძე, მარიამ ხუჯაძე—ალისუბნის თემის №1, ანა აბულაძე—ჩხარის №2. მასწავლებლებს შორის—3 გამარჯვებული: ნატო ჩხაბერიძე—თერჯოლის №1, მაკა ჭანტურიძე—ახალთერჯოლა, ლელა კვეციანიძე—ზედა საზანო.

**ესეების კონკურსი:** ჩატარდა მეცხრე-მეთორმეტე კლასების მოსწავლეთათვის, ორ ეტაპად. რაიონულ ეტაპზე მონაწილეობა მიიღო 16-მა მოსწავლემ. გამოვლინდა 5 გამარჯვებული: ნინო რობაქიძე—თერჯოლის №1, ნინო მაცაბერიძე—თერჯოლის №1, ლიზი დვალი—თერჯოლის №2, ნინო აბუხანდაძე—ახალთერჯოლა, ტარიელ კირკიტაძე—მზეკაბანი.

**მინი კონფერენცია:** ჩატარდა პედაგოგებისთვის. მონაწილეობა მიიღო თვრამეტმა პედაგოგმა, რომელთაც გადაეცათ სიგელები, კონფერენციაში წარმატებული ჩართულობისთვის.

**მხატვრული კითხვის კონკურსი:** ჩატარდა ორ ეტაპად, მეშვიდე-მეთორმეტე კლასების მოსწავლეთათვის და პედაგოგთათვის. რაიონულ ტურში მონაწილეობა მიიღო 32-მა მოსწავლემ და 13-მა პედაგოგმა. მოსწავლეებში გამოვლინდა 5 გამარჯვებული: ლუკა რობაქიძე—თერჯოლის №1, მარიამ კუბლაშვილი—თერჯოლის №2, ნინო გავაშელაშვილი—ღვანკითი, დალი თარგალაძე—თუზი, ანა კუბლაშვილი—მზეკაბანი, მასწავლებლებში გამოვლინდა 4 გამარჯვებული: რამაზ ლორთქიფანიძე—გოგნი, თამარ ამირანაშვილი—თერჯოლის №1, მანანა კუბლაშვილი—ალისუბნის თემის №1, მანანა წერეთელი—მზეკაბანი.

**ინტელექტუალური კონკურსი:** ჩატარდა ორ ეტაპად, მეცხრე-მეთორმეტე კლასების მოსწავლეთა ჩართულობით. რაიონულ ეტაპზე მონაწილეობა მიიღო 21 სკოლის გუნდმა. პირველი ადგილი—„მზეკაბანი-2007“, მეორე ადგილი—ქალაქ თერჯოლის №2 საჯარო სკოლა, მესამე ადგილი—ნავარევის საჯარო სკოლა. აღნიშნული გუნდების მონაწილე მოსწავლეები (15 მოსწავლე) დასაჩუქრდნენ კახეთის სამდილიანი ექსკურსიით.

**თეატრალურ შუადღეში** მონაწილეობის მიზნით, სკოლებმა წარმოადგინეს სპექტაკლის ვიდეორჩანაწერი, რომლის ხანგრძლივობაც არ აღემატებოდა 10-15 წუთს. რაიონულ ეტაპზე სპექტაკლი წარმოადგინა შვიდმა სკოლამ. გამოვლინდა 3 გამარჯვებული, ქალაქ თერჯოლის №1, ახალთერჯოლის საჯარო და კერძო სკოლა „მზეკაბანი 2007“-ის სპექტაკლები. თერჯოლის №1 საჯარო სკოლის სპექტაკლის, „მე ვხედავ მზეს“ მთავარი როლის შემსრულებელს, ანანო ბუცბრიკიძეს, გადაეცა სიგელი და ბიბლუსის 50 ლარიანი ვაუჩერი, როლის საუკეთესო შესრულებისთვის.

**ღია გაკვეთილების კონკურსში** მონაწილეობდნენ სხვადასხვა საგნის პედაგოგები (ქართული ენა და ლიტერატურა, მათემატიკა, მე და საზოგადოება, გეოგრაფია, ბუნებისმეტყველება, ინგლისური ენა, რუსული ენა, სახვითი და გამოყენებითი ხელოვნება, ისტორია, მუსიკა). მუნიციპალიტეტის ფარგლებში სულ ნაჩვენები იყო 22 ღია გაკვეთილი. ღია გაკვეთილების კონკურსში გამარჯვებულ 14 პედაგოგს (ასმათ ჩიტორელიძე,



თბილისი—ჩხარის №1 და ქვედა სიმონეთის №1 საჯარო სკოლები



ქართლი—კვახჭირის და ჭოგნარის საჯარო სკოლები



ფშავ-ხევისშრეთი—ალისუბნის №2 და ჩხარის №2 საჯარო სკოლები



პანკაში—თერჯოლის №2, ქვ. სიმონეთის №2 და ღვანკითის საჯარო სკოლები

4

# სიმები ჩვენ ვართ ყველაო!

რუსუდან ბოგვერაძე—თერჯოლის №1, ნორა ჩუბინიძე—„მზეკაბანი-2007“, სოფიკო ვაშაკიძე—სიქთარვა, ქრისტინე კაპჭელაშვილი, ნინო ამბროლაძე, ხათუნა აბუთიძე—გოდოგანი, ანერი აბესაძე—რუფოთი, მადონა ჭანტურიძე—ზედა საზანო, ლალი ნემსაძე—ახალთერჯოლა, იზოლდა ვარდოსანიძე—თერჯოლის №2, დარეჯან ჭანტურიძე, თეა რიყამაძე—ღვანკითი, შორენა ტაბატაძე—ჩხარის №2 გადაცემა სიგელები, კალენდარი და ბიბლუსის 50 ლარიანი სასაჩუქრე ბარათები.

### დასკვნითი ღონისძიება

ღონისძიების პირველი ნაწილი საკრებულოს შენობის წინ გაიმართა, ღონისძიება გახსნა და მთელი მისი მსვლელობა მიჰყავდა პროექტის სულისჩამდგმელს და ორგანიზატორს ქეთევან შეყრილაძეს. ქალბატონი ქეთევანი, რომელსაც ყველა ღონისძიების მომზადებაში გვერდით უდგას თანამშრომლები, აფასებს ამ ერთად ყოფნას, ერთი მიზნისათვის თავდაუზოგავ შრომას, ერთიან თანამოღვაწეობას.

რესურსცენტრის ხელმძღვანელმა მოკლედ, მაგრამ ყოვლისმომცველად ისაუბრა პროექტის მუშაობის დეტალებზე, სკოლების დამოკიდებულებაზე პროექტის განხორციელების პროცესში, მადლობა გადაუხადა სკოლების პედაგოგურ კოლექტივებს, მონაწილე პედაგოგებს, მოსწავლეებს, შეაფასა მათ მიერ ჩატარებული შრომატევადი სამუშაო და შედეგიც დადგა, რაც ღონისძიების მთელმა მსვლელობამ დაადასტურა. ქალბატონმა ქეთევანმა მადლობა გადაუხადა კონკურსების შემფასებელი კომისიის წევრებს იმ შრომატევადი საქმიანობისათვის, რაც მათ გასწიეს კონკურსების ობიექტურად შეფასება-შეჯამების პროცესში.

მანვე განსაკუთრებული მადლობა გადაუხადა მერიისა და საკრებულოს ხელმძღვანელ მუშაკებს თანადგომისა და მხარდაჭერისათვის.

ქალბატონ ქეთევანს დროდადრო ცვლიდა სიმღერისა და ცეკვის ანსამბლები (ხელმძღვანელები: გონა, ირინა ჭანკვეტაძეები).

სიტყვა წარმოთქვა მამა ქრისტეფორემ, მუნიციპალიტეტის მერმა მანუჩარ რობაქიძემ, საკრებულოს თავმჯდომარე გია ბარათაშვილმა, რომლებმაც მაღალი შეფასება მისცეს ღონისძიებას და შეფასებები და მადლობა კუთხეების დათვალიერებისას არაერთხელ თქვეს. ღონისძიებას ესწრებოდა მერის მოადგილე მირზა ქოჩიაშვილი, საკრებულოს თავმჯდომარის მოადგილეები დავით გოგბერაშვილი, ჯემალ ისაკაძე, მერიისა და საკრებულოს თანამშრომლები, სხვა მონაწილე სტუმრები, გამვლელ-გამომვლენიც კი.

### „სხვადასხვა კუთხის მცხოვრებნი“

ღონისძიებამ შემდეგ იქვემდებარე სკვერში გადაინაცვლა. აქ კი სულ სხვა სანახაობა და განწყობა იყო. თითოეული სკოლისათვის კენჭისყრით შერჩეული საქართველოს კუთხეები უკვე მზად იყო. თბილისი—ჩხარის №1 და ქვედა სიმონეთის №1 საჯარო სკოლა. ქართლი—კვანჭორის და ჭოგვარის საჯარო სკოლა, ფშავ-ხევსურეთი—ალისუბნის №2 და ჩხარის №2 საჯარო სკოლა, კახეთი—თერჯოლა №2, ქვ. სიმონეთის №2 და ღვანკითის საჯარო სკოლა, სამეგრელო—ბარდუბნის და გოგნის საჯარო სკოლა, გურია—თერჯოლის №1 და ძველის საჯარო სკოლა, სამცხე-ჯავახეთი—ალისუბნის №1 და ზედა სიმონეთის საჯარო სკოლა, იმერეთი—ახალთერჯოლის და ნახშირღელის საჯარო სკოლა, აჭარა—ენერის და სიქთარვის საჯარო სკოლა, რაჭა—გოდოგანის და ზედა საზანოს საჯარო სკოლა, სვანეთი—ნავარევის და რუფოთის საჯარო სკოლა, აფხაზეთი—თუზის საჯარო სკოლა და „მზეკაბანი“.

### სიმბოლური გზა თბილისიდან—აფხაზეთამდე

„საქართველოს კუთხეების“ დასათვალიერებლად მსვლელობა „თბილისიდან“ დაიწყო და „ცრემლს რომ ოდნავ აღემატება“, „ხელის გულზე დასატევ“ აფხაზეთის კუთხეში დამთავრდა, ეს იყო სიმბოლური გზა.

ნეტა მალე დადგეს დრო, ეს „შესვლა“ იყოს არა სიმბოლური, არამედ რეალური—ეს ფიქრი სდევდა ალბათ ყველა აქ მყოფს.

\*\*\*

კუთხეების დათვალიერებისას მოხდა კონკურსებში გამარჯვებულთა დაჯილდოება, სამადლობელი ბარათების გადაცემა. ამ ჯილდო-სიგელების გადაცემაში ქალბატონ ქეთევანს ეხმარებოდნენ მერიისა და საკრებულოს ხელმძღვანელი მუშაკები, რაც ერთგვარ ღირსებას ჰმატებდა ამ გადაცემებს.

ყველა სუფრა, გამორჩეული, ტრადიციული იყო. საქართველოს შესაბამისი კუთხეებისათვის დამახასიათებელი კერძებით, გაფორმებით, მხატვრული ნომრებით, მინი სპექტაკლებით, კულტურით, თითოეულ კუთხეს ჰყავდა თამადა—ქართული სუფრის მშვენიერება.

დათვალიერებული იქნა ყველა, თორმეტივე კუთხე. ერთ სივრცეში ჩატეხული მთელი საქართველო და ერთხმად აღინიშნა თითოეულის განსხვავებულობა და თავისებურება. ე.წ. ჟიური, შემფასებელი კომისია კი შეირჩა, მაგრამ მიღებულ იქნა სწორი გადაწყვეტილება, ადვილები არ განანიღდა, აქ ყველა გამარჯვებულად გამოცხადდა, ყველაფერი „შეემატებოდა“ ერთმანეთს. „ჩონგური საქართველოა, სიმები ჩვენ ვართ ყველაო, სხვადასხვა კუთხის მცხოვრებნი, ოდელა, დელა დელაო“—ისმოდა კუთხეებიდან. ერთხმად აღინიშნა პროექტის „ჩონგური საქართველო“-ს განხორციელების მაღალი დონე, რესურსცენტრის, სკოლების დამოკიდებულება პროექტზე მუშაობისას.

კუთხეების დათვალიერება, ნაირნაირი კერძების დაგემოვნება დიდხანს გაგრძელდა. ყველგან შეისვა ერთიანი, ძლიერი, განუყოფელი საქართველოს სადღეგრძელო, ჩონგურს ისევ უნდა გავუბათ სიმები, შევხმატკბილდეთ, ერთი სიმიც რომ განყდეს ვუშველოთ, ჩვენ, საქართველოს სხვადასხვა კუთხის მცხოვრებმა, რომლებიც საქართველოს წარმოვადგენთ.

„დღეიდან ქართველი ერი სუვერენული უფლებით აღჭურვილი ერია და საქართველო სრულფლებიანი დამოუკიდებელი სახელმწიფო“—საქართველოს ეროვნული საბჭოს მიერ 1918 წლის 26 მაისს, კვირას, ნაშუადღევს 5 საათსა და 10 წუთს გამოცხადებულ საქართველოს დამოუკიდებლობის აქტის პირველი პუნქტი, კუთხეებიდან ხმამალა ისმოდა.

\*\*\*

ღონისძიებას მხარს უჭერდნენ თერჯოლის მუნიციპალიტეტის მერია და საკრებულო, ლიბერთი ბანკი, გამოიკვეთა სკოლების და მუნიციპალიტეტის მერის წარმომადგენლების ერთიანობა. კონკურსის მონაწილეებს გადაეცათ კალენდარი, რომელშიც შესულია ხატვის კონკურსში მონაწილე მოსწავლეების ნახატები, გარეკანი გააფორმა ნახშირღელის საჯარო სკოლის XI კლასის მოსწავლემ ანა ბერძულმა, საგანმანათლებლო რესურსცენტრის უფროსმა სპეციალისტმა მაია რობაქიძემ, თუმცა მაიამ სხვაც ბევრი გააკეთა...



სამცხე-მთხეთი—ბარდუბნის და გოგნის საჯარო სკოლები



ბურია—თერჯოლის №1 და ძველის საჯარო სკოლები



სამცხე-ჯავახეთი—ალისუბნის №1 და ზედა სიმონეთის საჯარო სკოლები



იმერეთი—ახალთერჯოლის და ნახშირღელის საჯარო სკოლები





# „ჩონგური საქართველოა, სიმები ჩვენ ვართ ყველაო!“

5



ატარა—ენის და სიქთარვის საჯარო სკოლები



რატა—გოდოგნის და ზედა საზანოს საჯარო სკოლები



სპანეთი—ნაგარევის და რუფოთის საჯარო სკოლები



აფხაზეთი—თუზის საჯარო სკოლა და კერძო სკოლა „მზეკაბანი“

## გუნდური მუშაობის თემაზე შეკითხვას სკოლებმა ასე უპასუხეს

**თერჯოლის №1, ძვერის საჯარო სკოლები**

ჯერ კიდევ ხმინაობს პოზიტიური განწყობის ექო...

სპორტის სასახლის მიმდებარე სივრცე იყო ფერადი, სიხარულითა და ჟრიაშით სავსე. რესურსცენტრის ორგანიზებით განხორციელებული სარაიონო პროექტის „ჩონგური საქართველო“ დასკვნით ეტაპს შეიკრიბა მონაწილე სკოლები, საგანმანათლებლო სისტემათა თვითგანვითარებაში მოსწავლე-მასწავლებელთა მიერ განხორციელებული შედეგებს აჯამებდა.

ამ ფერთა გამაში, საქართველოს კუთხეების ამ ლამაზ კრიალოსანში გამოირჩეოდა თერჯოლის პირველი და ძვერის საჯარო სკოლების ნილხვედრი გურია, ეთნო-სიზუსტით გაცოცხლებული ეს საოცარი კუთხე...

ხეზე აცოცებულ მსხმოიარე ადესას ქვემოდან გიდელი ნდომით შეჰყურებდა, იქეთ გურული კალანდის ხილულ სურათს უზარმაზარი ღორის თავი ამშვენებდა. გურული მრავალფეროვანი სამზარეულოს შედეგები მადისაღმძვრელად ზომიერებდა. სივრცეს ამშვენებდა ამ კუთხისათვის დამახასიათებელი საყოფაცხოვრებო ნივთები, თივის ბუდელები, ფარატინა ღობის ფრავენტები, ღვიოდა საველე სამზარეულო, ქუხდა მუსიკა, ორიგინალური ბანერებიდან გვიცქეროდა გურიის ადამიანური თუ მატერიალური სიმდიდრე... ამ დახვეწილ, გემოვნებიან და ხვავიან არეალს ბევრი დამთვალიერებელი ჰყავდა, რომელთა სახეზე იკითხებოდა ცნობილი გურული სიმღერის სტრიქონები:

„გურიაში მივალ მარა, სულმა წინ-წინ გეიპარა“.

შთამბეჭდავი იყო ნამდვილი გურულის, მამა ქრისტეფორეს სტუმრობა, რომელმაც შეაქო და დალოცა ამ სილამაზის შემოქმედნი, რომლებმაც მას თავი მშობლიურ გარემოში აგრძნობინეს.

ბევრმა თერჯოლებმა, შინაურ-გარეულმა დააგემოვნა გურული სუფრა და მასპინძლობა, ხშირად ისმოდა ალტაცებული შეძახილები: „რა ყოფილა გურია!“

**ჩხარის №1, ქვ. სიმონეთის №1—საჯარო სკოლები**

ლონისძიებაში მონაწილეობის მიზანი იყო: პროექტის ფარგლებში ორი სკოლის გუნდური მუშაობის ხელშეწყობა და მეგობრობის გაღრმავება.

საერთო თემატიკიდან გამომდინარე, ჩვენი გუნდი მუშაობდა თბილისის ტრადიციებსა და კულინარიის ელემენტებზე და აქედან გამომდინარე გაეცვენ მოსწავლეები ძველი თბილისის სუფრის კულტურასა და პენს.

შეისწავლეს ძველი თბილისური მაგიდის სერვირების ელემენტები და კულინარიული დიზაინის შექმნის ხერხები.

აიმაღლეს საზოგადოებასთან ურთიერთობის და სტუმარ-მასპინძლობის უნარ-ჩვევები. ღონისძიებაზე წარმოდგენილი იყო მოსწავლეთა ნამუშევრები თბილისის თემატიკაზე, ძველი თბილისური ეზოების ტრადიციები, ჩაის სმის კულტურის ელემენტები, ტივზე გაშლილი სუფრის ფრავენტები, ბარბა-

რე ჯორჯადის რეცეპტებით მომზადდა ტკბილეული, „ტარტალები“ იგივე კალათები ხილითა და მურაბებით. საქარლამის სვეტები კვანარახისა და ნუშის საფენებით, ტრადიციული თბილისური ტალხუნის ღვეზელები, სხვადასხვა ნუგბარი შემკობილი მიხაკ-დარიჩინის სუნელებით და სხვა კერძები.

დოკუმენტური მასალების მიხედვით ჩაის სმა თბილისში გამორჩეული ჭურჭლის გამოყენებით ხდებოდა, სხვადასხვა ხილის მურაბებით და სამოვრებით. შევეცადეთ ამ ფაქტსაც გაცნობოდნენ მოსწავლეები თბილისური გემოების ფონზე.

ჩაივლიდით მტკვართან ხეივანს და გაზაფხულის მაყრებივით გეგებოდნენ უნიჭიერესი მოსწავლეები ორივე სკოლიდან, ყარაჩოლელები, კინტოები და თბილისელი ბანოვანები, შარდენის ქუჩისა და იტალიური ეზოების ფონზე...

**ახალთერჯოლის და ნახშირღელის საჯარო სკოლები**

ჩვენთვის განკუთვნილ ადგილას წარმოვადგინეთ იმერული ეზო თავისი ოდა სახლითა და მოწნული ღობით, ეზოს ერთ კუთხეს ამშვენებდა თონე, მეორე კუთხეს-იმერული ჭურ-მარანი. ეზოს მთელ სიგრძეზე გამოვლილი იყო სუფრა, გულუხვი მასპინძელი სტუმრებს ელოდებოდა. მათაც არ დააყოვნეს. მასპინძელმა „ორლობში“ მოჰკრა თვალი თუ არა სტუმრებს, წინ მიეგება, „აქეთ, ჩემთან წამობრძანდით, ჩემო ბატონო, ჭიქა ღვინო დამილიეთო.“ „მასპინძელი „ორლობში“ შემომეგება და როგორ არ მოვიდოდითო.“—აღნიშნა ახალთერჯოლა-სიქთარვის მაჟორიტარმა დეპუტატმა ბატონმა ჯემალ ისაკაძემ. მამა-პაპური სადღეგრძელოს შემდეგ ღვინო გაიმართა. იმერულ ლექსს სიმღერა ცვლიდა, სიმღერას-ცეკვა. მოსწავლეების მიერ წარმოდგენილ პიესაში ერთმანეთს ჰარმონიულად ერწყმოდა იმერული სტუმარმასპინძლობა და არისტოკრატიზმი, სიამაყე და სიხარული, წარსულის გახსენება და დღევანდლობით ტკბობა.

ბოლოს გესურს მადლობა გადავუხადოთ თერჯოლის საგანმანათლებლო რესურსცენტრის ხელმძღვანელ ქალბატონ ქეთევან შეყრილაძეს საინტერესო პროექტის წამოწყებისა და განხორციელებისათვის; თერჯოლის მერიის წარმომადგენელს ახალთერჯოლის ტერიტორიულ ერთეულში ბატონ გიგა კუბლაშვილს თანადგომისათვის; ახალთერჯოლის საჯარო სკოლის აქტიურ მშობელს ქალბატონ ნანა ნიკოლაძეს მხატვრული გაფორმებისათვის; მოსწავლეებს: ნინო ქაშაკაშვილს, დავით კუხიანიძეს, საბა ქაშაკაშვილს, ნიკა დევიძეს, გიორგი თორთლაძეს, შოთა ჯაშს იმერული ყოფის ამსახველი რესურსების შექმნისათვის. „სახელს უმატეთ სახელი, ძვირფასი საბოძვარია.“

\*\*\*

ღონისძიება საქართველოს ჰიმნით გაიხსნა და ჰიმნითვე დაასრულეს საქართველოს კუთხეებში.

შუშუნა ცხადაძე

### შპს „თერჯოლა“

გამომცემელი  
ვალერიან გოგიაშვილი  
599 92 49 75

მოავარი რედაქტორი  
დავით კლდიაშვილი  
599 91 24 14

სარედაქციო კოლეჯია

რეგისტრაციის №53/5/ზ-22  
გამოდის თვეში ორჯერ

### კორესპონდენტები:

ნ. გამყრელიძე—555 78 08 55  
ი. მარუაშვილი—0(491) 22 15 16  
ჟ. ცხადაძე—558 90 82 55  
მ. ცქიფურიშვილი—555 28 11 41

ელ-ფოსტა: [gazetiterjola@gmail.com](mailto:gazetiterjola@gmail.com)

აიწყო და დაკაბადონდა რედაქციის კომპიუტერულ ცენტრში

### მისამართი:

ქ. თერჯოლა, კოსტავას ქუჩა №2  
დაბეჭდა ქუთაისის  
შპს „სომელი ენ“-ის სტამბაში  
ქუთაისი, ჭავჭავაძის გამზ. №33

### ჩვენი რეკვიზიტები:

„ლიბერთი ბანკი“  
LBRTGE22,  
ანგარიში  
GE32LB0113133960124000  
ს/კ 231948872